

# 3 مجانبين



محمد علي عيسى

الساعة السادسة مساءً في آخر يوم لهذا العام بينما يستمر البرق والمطر بجميع أنحاء مصر يتلقى الجميع رسائل تحذيرية على الهواتف توجبهم بمتابعة الأخبار بأي وسيلة ممكنة على الفور.

من شرفة منزل بمصر القديمة جلس صادق مهندس شبكات وقد أشعل سيجارة ووضع كوباً من السحلب إلى جانبه ليفتح حاسوبه المحمول ليتابع ماذا يجري وإذا بكل المواقع الإلكترونية وقنوات البث في العالم تلقى بياناً:

" أيها المواطنون هذا ليس إختبار أكدت مصادر موثوقة من وكالات الفضاء الروسية والأمريكية عن قرب اصطدام نيزك بكوكب الأرض يبلغ حجمه أضعاف حجم الكوكب فيما يمثل نهاية كوكب الأرض وقد تحدد موعد الاصطدام بعد أربعة وعشرين ساعة من الآن "

يفتح بعدها صادق معطفه حيث فقد الشعور بالبرد لوهله ودلف للداخل بسرعة ليبحث عن أمه ليجدها قد خلعت النظارة الطبية خاصتها بعدما شاهدت نفس البيان على التلفاز، ليتحدث بعدها قائلاً :

" شفتي يا ماما اللي حصل هنعمل ايه ؟ "

أم صادق : " ولا حاجة أدينا عايشين لحد ما يبجي وقتنا عشان نموت "

صادق : " يا أمي العالم كله بيقول وقتنا جه خلاص هنسلم كده ونموت "

أم صادق : " يا ابني أنا قضيت عمري ف تربيتك بعد ما أبوك مات وأديت رسالتي ف الحياة وخذت اللي عايزاه م الدنيا ، الدور والباقي عليك أنت قربت على الأربعين ومش عايز تعمل حاجه ف حياتك "

صادق : " يعني ده وقته ، طب أعمل ايه ؟ "

أم صادق : " اعمل كل حاجة أنت كنت عايزها قبل ما تموت ، أنا خلاص هقعد ف البلكونه ومعايا كوباية شاي واستنى قدرى ونصيبي ، اخرج شوف أصحابك وانبسط ف آخر ساعات عمرك "

ليرن هاتفه وإذا بالمتصل هو حمزة طبيب بيطرى وصديق عمره وزميل دراسته فى الصغر ليجيبه : " أبو زين شفت اللى بيحصل "

حمزة : " بتابع كنت ف العيادة ولسه داخل البيت ، الدنيا خربانه بره فى ناس بتصلى ف الشوارع وناس بترعى نفسها من فوق البيوت وفى عيال ملزقة متصلين بيا بينظموا حفلات قتل جماعى ، الناس اتجننت "

صادق : " بتابع نفس الكلام اهو ، دلوقتى الشركات العالمية بدأوا يبثوا الانترنت بالأقمار الصناعية بيقولوا شبكات الاتصال العادية هتقع ، استنى عشان فى حاجه غريبة بتحصل "

حمزة : " أغرب م اللى احنا فيه "

صادق : " كل الجيران واقفين ف البلكونات وأمى واقفه معاهم بيتكلموا ويضحكوا ، الكلام ده مشفتوش من أيام ما كان عندى عشر سنين "

حمزة : استنى عشان فى حد بيتصل ده زقزوق ، هدخله معانا "

زقزوق : " أحمزو فينك يا عم ، أنا ف الورشة م الصبح ، أخر زبون جابلى عربية دفع رباعى جديدة أغيرلها زيت وسابلى العربية ومشى بيقولى الكوكب هيموت "

صادق ضاحكا : " ضحك عليك ياد ، الميكانيكيه اللى مبيفهموش بس هما اللى هيموتوا يعنى سلم على أمك قبل ما يخطفوك يا زقزوق "

زقزوق : " يا عم حمزة مقولتتش ليه أن الكائن ده ع الخط "

صديق : " والله وعرفت أن في كائنات غير الحمير يا زقزق فاكر يالا وأبوك جاى على حمار م البلد وأنت كنت قاعد تقولنا جدك عنده حمار بدورين "

حمزة : " بس مش وقت سخافه منك ليه اضبطوا كده لما نشوف هنعمل ايه ف اللى احنا فيه "

زقزوق : " كلمت أمى بقولها أجي أخذك ، قالتلى متجيش أنا مش هسيب بيتى وراكنه أخواتى وعيالهم جمبها وبتقولى عايزه أفرح بيك قبل ما أموت "

صديق : " وإيه الجديد يا ابن هناء ما بقالها عشرين سنة بتقولك نفس الكلام ".  
زقزوق : " شايف يا عم حمزة أنا مش عايز أتكلم عشانك "

حمزة : " ماهو عنده حق بردو يا زقزق هتأخذها على فين هيا الكهريا قاطعه عندها ده الكوكب كله ياد أنت نسيت الهندسه من بعد ما مسكت أم الورشة دى "

صديق : " دى دعوة هناء يالا اللى قفلت الكوكب كله مش كانت بتقولك ربنا يتوب عليك م الشغلانه ، أهو هيتوب علينا كلنا عشان خاطر أمك "

زقزوق : " أول مرة تقول حاجه صح ياد يا صديق أنت لسه بتهكر موبايلات الناس "

حمزة : " بس بقا أنت وهو هنعمل ايه دلوقتي ، أنا مراتى مش عايزة تسيب البيت بتقولى نأخذ شاي وبسكوت والواد إبني ونحضر آخر لحظات الكوكب مع بعض "

صديق : " لا بس غريبة أنت صوتك على هيا مش عندك ولا أنت مبقتش تخاف "

حمزة : " أنا اکتفيت من دى دراما ، أنا هطمن عليها وع الواد واحنا لو ناقصنا حاجه قبل ما نموت هتبقى طلعه من بتوع زمان "

صديق : " وربنا أنت صح ، خلاص احنا على نص الليل بالظبط نكون ف قهوة الواحة "

حمزة : " واد يا زقزوق هات العربية اللي عندك دى وأنت جاي صاحبها خلاص معادش محتاجها ، وجهاز لنا أى لوازم تقابلك أكل ودوا وخلافه ."

صديق : " ومتنساش السجاير يا ابن هناء ."

زقزوق : " مش عايز هدوم داخلية بالمرة ."

صديق : " لأ أمى لسه شارياالى ."

حمزة : " خلصنا يا عم سينما الأطفال أنت وهو إقفلوا دلوقتي وعلى معادنا ."

بعد ساعات على سطح منزل حمزة يمشى هو بإتجاه زوجته أيه وابنه زين ممسكا بكوب من الشاي ويتحدث قائلا " أتأخرت عليكي ."

أيه : " خليك معايا نقضى الباقي من عمرنا مع بعض ."

حمزة : " أنا عمرى ما زعلتك ؟ ."

أيه : " أبدا ."

حمزة : " يبقى الساعات الباقية من عمرنا خليكي جنب بابا وماما ، أنا محتاج أشوف صحابى دى هتبقى المرة الأخيرة اللي نتقابل فيها ."

أيه : " طيب شوفهم وارجع إقعد معانا ."

حمزة : " بابا وماما محتاجينلك أكثر ما أنا محتاج لك ، وأنا هتظمن أكثر وأنتي معاهم ، أنا بحبك أوى ، ومبحبش أشوف حاجة وحشة تحصلك ولو آخر يوم ف عمرنا ."

أيه : " هتوحشنى ."

حمزة : " وأنتي كمان يا حبيبتي أنتي و زين ، خد بالك من أمك يا كلب البرك ."

بعد عدة ساعات تدق الساعة الثانية عشرة صباحا منتصف الليل ليلتقى الثلاثة  
أصدقاء صادق و حمزة و زقزوق بقهوة الواحة بمدينة نصر .

حمزة : " والله زمان يا جدعان "

زقزوق : " العمر عدى خلاص يا ولاد ، هنعمل ايه دلوقتي "

حمزة : " ودى فيها كلام ، هعمل أكثر حاجات نفسنا نعملها ف حياتنا "

زقزوق : " أنت عارف أيه أكثر حاجة عايز تعملها ف حياتك ؟ "

حمزة : " مفيش ف دماغى حاجة معينه بس أكيد هعرف "

زقزوق : " سمعت الأخبار ف الراديو وأنا جاى ، ناس كتير متوجهين للكعبه ، وفي  
محارق جماعية لناس ف دول شرق أسيا

حمزة: " ده بيقولك فى إنتحار جماعى ف دول أوروبا وحفلات نهاية العالم ف  
أمريكا وبيقولوا فى صواريخ طالعه المريخ "

زقزوق : " بس أحب أقولك أنهم بيسرحوا بالناس لأن النيزك قفش ف أم الكوكب  
لطش من فوق ومفيش أى صاروخ هيعرف يعتق منه عشان يطلع لازم يلبس  
فيه "

حمزة : " الأخ اللى معانا ده بقاله ساعة ومنطقش أصادق "

صادق : " عارفين أنا نفسى أعدى على مديرى دلوقتي ، بينا يا رجالة "

حمزة : " وده هتعرف مكانه إزاي ؟ "

زقزوق : " ده مهكر ثلاث أربع موبايلات البلد هيحدد مكانه طبعا "

ليتحرك الثلاثة بالسيارة لمدة نصف الساعه لتتوقف داخل فيلا داخل كمبوند بالقاهرة الجديدة بعد أن كسرت باب الفيلا الداخلى لينزل **صاديق** ويتحدث إلى سيدة خمسينيه يبدو عليها الذعر قائلا : " جوزك فين يا وليه "

لينزل من أعلى السلم الداخلى رجل خمسينى بشورت أخضر قائلا : " فيه ايه **صاديق** أنت بتعمل ايه هنا "

**صاديق** : " شوف يا أمجد "

ليقاطعه قائلا : " اسمى المهندس **أمجد** أنت اتجننت !! "

ليتحديث **زقزوق** ممسكا شاكوش بيده : " اكنتم يالا "

**صاديق** : " لأ مهندس دى عند أمك لما تروح تزرط عندها إنما ف الشغل احنا بنعتبرك حمار ، إسمع يا زباله المدرا يا عرة الشركات يا أمرض خلق الله نفسيا ، كلنا عارفين أنك متعين بالواسطه وأنت ملكش لازمة وبتعين موظفين مكسحين عشان قرايب مراتك أنا جيت أقولك اسفوخس ع اللى شغلك اللى زيك مكانه ف صندوق الزباله مش ف أى شركة محترمة "

**أمجد** : " ده اتجنن باين "

**صاديق** : طب ايه رأيك يا حاجة أننا عارفين أنه ماشى مع إسراء بتاعة الاتش أر مرأة ابن أخوكى وبيقعد يقولها الشنب حلو ولا أحلقه والقرعه حلوه ولا أزرعها ، يالا إلبس يا حلو ، سلام يا خيببتها ، بينا يا رجالة "

ليغادر الأصدقاء بالسيارة وسط صياح الزوجين ، لتتعالا الضحكات داخل السيارة أثناء خروجهم من الكمبوند ليتحدث **حمزة** قائلا : " ده أنت كنت شايل منه جامد يا **صاديق** "

صديق : " ده قارفنا ف الشركة بقاله سنين عبده بتاع الكفته اللي على أول شارع الشركة بيْفهم عنه، وكل شويه همشيكم م التيم وهطردكم م الشركة وكأننا شغالين عند أمه ، بس أنا مبسوط أنا سعيد أنا فرحان أنا حلو وجميل ، هنعمل ايه دلوقتي ؟ "

حمزة : " دورك يا زقزوق عايز تعمل ايه ؟ "

زقزوق : " أنا مش عايز حاجة م الدنيا ياولاد أنا عشتها طول وعرض كفاية عليا الطلعه دي ، بس ايه رأيكم ف مسكة الشاكوش ."

حمزة : " أنا من يوم ما بطلت سجاير مفيش حاجة كيفتني غير مسكة الشاكوش دي ."

صديق : " أنت هتعموم على عومه شاكوش ايه ده أهبل ده وبيقولك مش عايز حاجه م الدنيا ."

زقزوق : " اه مش عايز حاجه ."

صديق : " ولا عايز تتجوز غدير زميلتك من أيام الجامعه ."

زقزوق : " أنا نسيتها خلاص وبعدين هيا إتجوزت من ثلاث سنين ."

صديق : " ماهي اتطلقت من كام شهر ."

زقزوق : " بجد ."

حمزة : " وأنت مش كنت نسيتها ."

صديق : " أحمد زقزوق نسي كل حاجة ف كلية الهندسة إلا غدير دي كانت عندنا ف القسم ، كان يسيب محاضراته وييجي يحضر معانا ."

زقزوق : " خلصت ."

حمزة : " هجوزها لك ، عصفورين بحجر أنت محبيتش غير البت دى وحلفت ما تتجوز غيرها وأمك عايزه تشوفك متجوز قبل ما تموت "

زقزوق : " يعنى فى أمل يا حمزة "

حمزة : " عيب ياد ده اللى مبيعرفش يجوز حيوان بيحيبه ويجيلى هغلب فى جوازة كلب زيك ، واد يا صادق شوف لنا مكانها فى دلوقتى "

صادق : " جاهز وع السكه خلاص ، خد الموبايل ده وامشى ع الجى بى اس يا عريس "

لتنطلق السيارة بعدها وفى تمام السادسة صباحا تتوقف بالقرب من أحد شواطئ الساحل الشمالى حيث تقف امرأة أمام البحر فى البرد القارس .

نزل الثلاثة من السيارة ويتحدث حمزة قائلاً : " هيا دى يا زقزوق "

زقزوق : " هيا "

حمزة : " إلبس البدلة وكلم أمك فرحها "

ليتحرك حمزة صوب الفتاة وسط ذهول من صادق و زوزوق

صادق : " أنت هتقف تتفرج يا ابن هناء ما تخلص ولا أنت مش عايز تدخل ، يا فرحة أمك بيك هتدخل وتخرج فى نفس اليوم "

بعد نصف ساعة يرجع حمزة قائلاً : " يا عريس تعالا "

زقزوق : " أنت بتتكلم جد ، أنا كنت عارف أنها بتحبنى "

حمزة : " وربنا ما كانت فاكراك ، إسمع أنا و صادق شهود على جوازك خد الحباية دى بنديها للحيوانات وإجرى خد البت وطير قبل الساعة تلاته تكون فى اسكندرية "

صديق : " ليه اسكندرية ؟ "

حمزة : " هتعرف دلوقتي "

زقزوق : " والحباية دى بتدوها للحيوانات عشان تهدوها "

حمزة : " لأ دى بنديها للحيوانات اللي فاقدين الأمل فيها "

بعد عدة ساعات توقفت السيارة التي يقودها حمزة أمام أحد المنازل بالعمورة وما هيا إلا لحظات حتى إلتقى حمزة بحبيبته الأولى هند لتتحدث في ذهول : " أنت !! "

حمزة : " قولتك هنتقابل تاني ، أنا مش ندمان على كل اللحظات الحلوه لأنني قضيت أحلى منها، أنا ندمت أنك ما كنتيش تستاهليها "

لينطلق بعدها عائدا إلى السيارة وسط صرخاتها وأصوات تكسير زجاج النوافذ ليركب بعدها السيارة فإذا بزقزوق قد عاد .

حمزة ضاحكا : " إطلع بسرعة قبل ما ترمى حاجه علينا "

زقزوق : " أنت عملت ايه ؟ "

حمزة : " لأ ده تار قديم ، أنت اللي عملت ايه ؟ "

زقزوق : " لأ ده تار قديم بردو "

صديق : " استرها يارب "

زقزوق : " بس ياد ، على فين يا حمزة ؟ "

حمزة : " هنحضر النهاية من فوق الهرم ، هنوصل ع المعاد "

قبل السادسة بخمس دقائق يجلس الثلاثة فوق هرم خوفوا وقد أشعل كل منهم سيجارة منتظرا النهاية.